

菲島雜詩

江孔殷署



140

9
4

MG

1226

298/3

孔
島
雜
詩



3 1764 7889 3



影 近 者 作



每後肺腑論金石共引壺
觴話離天遣投京知
有意三年光景百篇詩
庚辰九秋 望子老及有菲
島雜詩之刻 製以印奉
貽并騰小詩外誌 識

警予吟兄以菲島雜詩行將付梓索句爲題一闕卽希

正之

庚辰孟冬楊昌國宜侯倚聲

胸中塊壘愁心千疊者般客况滋味道是三年去國江山如此祇緣難澆
杯酒最多情鼠肝蟲臂車轂擊馬蹏驕盡付與珠璣字 負戟東方曾
記風土寫炎洲問今何世豪放心情一片滄浪子美烏衣恨休重說遙望
眼誰家燕子這幾許卻把詩篇乙乙寄調寄聲聲慢

警予詞兄屬題菲島雜詩時余亦有詩存之刻喜成一絕

覺夫陳治平初藁

吾詩平澹少雄姿君詩蒼鬱更嶽崎人生快事殊難得爭取刊詩壯歲時

汪序

山海隔中州素心人遠烽火連三月華髮春生况際災年並爲遷客歸思
濃於酒浮谿閒却傳盃相望寄此身玉局潛焉出涕縱道先生睡足鐘撞
五更嘯憐季子嘯應齋過半月尋仙徐福塵颺莫問麻姑呵壁靈均天對
不逢柳子矣或謂毛錐安用終軍西已棄繻詩卷長留巢父東將入海金
銀氣霸珠玉聲雌賈慕鷄林解詩遜竈中之嫗居鄰鮓囊逐臭多海畔之
夫與其鼠璞襍登狗貂令續無寧豹毛澤霧鴻羽飛冥况郭錦索還江才
已躋溫碑寫罷魏拙誰藏背師學鳩舌之音道衰孔鳳對客作鮮卑之語
狂笑顏彪不平則鳴有懷必怨享鷄鶩以鐘鼓徒寓莊諧著猿猱以衣冠
終嫌楚沐然酌唱之作視聽所歸人日花前此虜幾銷曉風柳外四裔能

歌但不見笑倒綳何妨奴呼畫壁至如秋花比落春鳴先知各聘天機任
騰物議寃非帝女勿將精鳥愚人晉有屈靈忍學山膏罵已吟懷惘惘餘
韵珊珊移海上之情成連錯過聞異方之樂移監同悲縱欲言詩起余誰
可無忽深趣非子曷云故陸務觀大散秋風一少陵之變城斜日也王子
安落霞孤鶩一開府之楊柳春旗也劈彩舒衷情涯欲絕敲金琢韻氣岸
彌雄於是景仰前修綴成短什關懷家國眷念朋儕天涯比隣杜少府四
海知已洲上落日劉隨州五言長城雁逐九秋弔影雖分千里人來百粵
音書不滯一鄉我所思兮其室則邇民亦勞止與子同仇驚看帶甲乾坤
一劍氣寒西北噴出虹霓胸臆孤峯勢壓東南

中華民國二十九年四月照陸汪煌輝序於菲律賓濱天南吟社

陳序

蘇子警予向與雲聲合刊甲子雜詩已選入石遺室詩話予曾爲之序其詩雖高亢而情則閒逸五十廬變警予違難至岷任抗敵會記室兩年公餘不廢吟咏又有非島雜詩之刊謂予能道其心思郵書請序予時任教霧島與警予相隔帶水輒於報上讀其詩則激揚悽楚其雄邁之氣可以廣秦風之無衣其憂悄之思可以補王風之黍離間或紀炎洲殊俗爲季札之觀風時或念朋輩睽違銘子山之思舊雖在瑣尾流離要能自據鬱積蓋其遭際之不同亦環境使然也沈濤園有言國雖板蕩不可無史人雖流離不可無詩警予此詩謂爲史詩可也嗟乎長鯨跋浪幾變滄桑玄鳥無家競棲林木緬懷故國愴焉欲涕序此滋予痛矣

中華民國二十九年五月陳桂琛書於宿霧華僑中學

于序

余昔居廈鼓聞蘇君警予名未見其人丙子春遊虎溪巖值鷺江詩人雅集得邂逅君然猶未讀其詩及抗戰軍興廈島淪陷君避難遠客非地爲僑界救國團體聘襄文事公餘輒以其懷遇發爲吟詠間或載諸報章雖零縑斷簡未窺全豹而愛國思鄉之念油然而興亦可見積之久而彌光也君茲選輯近作菲島雜詩百三十首付之剞劂余以君所作有干戈塵世淚風月草堂身氣概因掇放翁讀杜詩結句後世但作詩人看使我撫几空咨嗟二語以示同感

中華民國二十九年秋于以同序於菲律濱華僑商報

龔序

詩之一道感人最深自昔勞人思婦遷客騷人每有所觸輒寄之於詩其顯者如唐之杜少陵宋之陸劍南丁字內破碎之際間關萬里奔走流離身之所經一一形諸吟詠時出其忠憤之誠以寫夫纏綿悱惻之思後之人至以詩史稱之先聖所謂詩可興可觀可羣可怨者此也蘇子警予風雅士也性耽詩於五七絕尤工異時余僑居廈之鼓浪嶼適林君叔臧倡立菽莊吟社一時過江名士多幾如鯽蘇子卽推爲社中健者每誦其所作覺英爽之氣逼人眉宇是爲余心折蘇子之始歲己卯國遭不造東夷肆擾相率避地於菲之岷尼拉故鄉人士端居多暇復組一天南吟社互相賡和文酒之會隔旬一聚蘇子爲職守所羈雖不時至然每出一詠則

輒傾其座人視前之所造尤有進焉閱時既久哀成巨帙近選其所作古近體詩都一百三十首名曰菲島雜詩將以付梓索序於余余老矣學殖日荒於詩尤爲門外漢何能贊一辭惟慨吾輩生當斯世既不能和其聲以鳴一代之盛至遯荒海外又不能一日安於其居而蘇子獨能於公餘之暇優游諷詠舉夫異邦風土之殊故國敵愾之績皆於詩著之試例諸杜少陵陸劍南諸集其高掌遠矚且有過之者他日風行海內爲吾國輶軒之採則卽作瀛寰誌觀也可作抗戰史觀也亦可夫豈第揚風挖雅陶情於一時已哉是爲序

民國二十九年雙十節晉江龔顯禧書于菲島之邱氏寓園

柯序

自菽莊主人以詩主持閩南壇坫社事賡續幾三十稔吾廈池直夫阮文錫黃荔厓而後詩聲爲之一振嗣是海天鷺江諸吟社踵起繼聲余先後參與其間時與海內吟侶角逐騷壇而吟事之盛尤以菽莊提倡之力爲多蘇子警予入社稍晚實爲後起之勁君與余詩均選入菽莊叢刊及石遺室詩話迨廈門之變社侶星散韻事消沉回首前塵彌深今昔之感矣顧余橐筆南來與君同客岷江復偕南渡諸子有天山吟社之組織間時觴詠略破客中岑寂君案牘餘閒偶有擬作輒出相矜示其詩瓣香定菴經喪亂之後多傷時感舊之什有陸放翁元遺山襟抱黍離興感殆發於情之不能自己耶頃君哀集菲島雜詩古近體都百三十首欲編印成冊

藉留海外泥爪徵序於余余維閩詩正聲首推林子羽高彥恢後謝在杭
曹能始繼之出以新意而作風一變曩者毀菴石遺諸老傾向西江詩清
微淡遠挹之無窮蔚爲吾閩宗派君近由定菴而上溯后山山谷將來以
西江爲歸宿由炫麗而臻平淡穩健漸入奇險則詩境又一進矣請刮目
以俟之是爲序

庚辰孟冬柯伯行識於岷江寓樓

菲島雜詩

警予蘇甦初稿

五古

到馬尼刺感作

揮手別鷺門千里蒼波逐浩蕩
曠胸襟汪洋壯心目故國半成墟
迴首堪痛哭炎荒一戾止傲骨難諧俗
同流儻未能此身難託足高蹈非所言
無以在忍辱步履失其常天真未易復
堪笑復堪憐何殊自桎梏西方有哲人
志行欽奇卓白晝走康莊臨風秉高燭
問渠胡爲然欲把善人矚言外有深意
此意誰能蓄滔滔天下人十九溷其濁

乞食和陶二首

飢驅我乞食遑遑欲何之
跋涉到南蠻鳩舌異言辭
故人情獨摯殷勤款

曲來遙夜縱高譚
濁酒泛深杯酒酣
情不禁卽席賦新詩
新詩道肺腑非
敢展奇才客心良
自慰勝彼千金貽

行行重乞食亦窮無復之
徬徨立道左誰可共言辭
自問何爲者無人一
顧來昔日賓朋聚酒至
輒傾杯杯盡有餘興
擊鉢復敲詩今日窮到此
自媿乏詩才世有知我者
千金肯相貽

旅中雜感

惘惘出門去機輪軼塵軌
靜裏懷故園分明呈案几
血漬雜啼痕渲染驚
江水避地身差健破涕翻自喜
一曲念家山其聲何焦殺
聆罷髮衝冠劍氣橫吹映沙場
諸健兒犧牲極壯烈四萬萬散沙今日方團結

抗戰一年餘勝利已成熟行見東海夷翻悔抱頭哭最後五分鐘便知誰
盈胸歸去有扁舟熙攘自耕讀

千里來投荒勞人又草草秉筆誅奸回理直歸有道我愛古中華歷劫猶
永保大地布妖氛無難一一掃

自我來居夷忽忽十二月形影雖相隨心情猶恍惚國難今方殷千鈞繫
一髮暴敵肆摧殘昭然已若揭廣莫沙場中鮮血與白骨抗戰展長期侏
儒終一蹶前途抱樂觀精神爲奮發

虜騎劫中原倭氛今爲烈劫火盡成灰燼火又熱念此恨填膺仇讎何
深結衛國資萬民矢志同撲滅所需無別物其唯鐵與血橫行看幾時崩
潰在一瞥勝利終屬我奇恥無難雪

書生百無能中年遭家累哀樂飽經營心力已交瘁何以謀生事至竟入窮匱家累費支持國難又頻至無奈走南溟暫時與地避我非畏死徒來此釣名利董狐筆在手誅奸乃素志出力與輸財及時爲鼓吹雄獅吼亞東狐鼠紛投地山嶽我獨尊羣雄聽旨意此言非夢想定是意中事

平生好飲酒飲酒達昕夕昕夕不見倦酩酊意可適一飲不論斗斗盡繼以石醉後發狂言驚座案頻拍頗似灌夫狂罵人語不擇敢誇理氣兼姦佞多避席怨毒於人甚罪戾因以獲一意只孤行容易遭橫逆南來風轉帆狂放不如昔習俗能移人此語真不易隱痛有難言爲身方作客回頭乃是岸會當自鞭策

平生唯好古日與古人接閉戶喜攤書倚牕輒臨帖上下五千年約略經

涉獵會心總未能於意亦云愜閒來喜習靜書畫藏盈篋尤喜聚頭扇展玩不疲茶海內遍蒐羅案頭堆摺疊藉資爲紀念盒名號百箋

答吳竹僊

海外擬桃源聯翩向南發好風吹送來彼岸藉寶筏夷居多見陋淹留經歲月離亂結心腸吟咏增奮越膏粱雖可求滋味輪野蕨搶攘市廛間來去勞迎謁

己卯元夜感作

去年今夜月照我初來客今年今夜月已是舊相識月我兩難忘同是客異域你客何曾愁我客心悠悠悠悠家千里千里怕回頭

岷市

夙昔已知名時懷一爲履命駕忽來臨所見亦爾爾政教假文明風俗多卑鄙賄賂自公行遍地藏奸宄欲贊唯一辭蒙皮差可擬輻輳四面通堪稱一鬧市輪聲雜蹄聲馬糞隨塵起齷齪最堪誇雨過盡泥滓欲言信多端大略已如是惟有我同胞視同桃源耳避難爭來此且俟干戈止

雨牕書懷

小牕正苦熱悶損心悒悒疾雷破山來周天失蒼莽密雨散千絲萬瓦琤琮響解慍有薰風夜氣入涼爽起坐獨挑燈一屋憑俛仰興味自蕭然蕭然出塵想

故人

故人忽南來握手兩意癡萬感填胸臆杯酒話流離孤雁斂雲翼籬下覓

棲枝託身雖有所失羣良可悲引吭發高吟同調知爲誰歧路獨徘徊徘徊何所之

擬長吉詠懷二首

在昔鄭所南著書藏智井孤憤披肝膽處世存形影閉口欲無言如喉骨在梗一吐快當前識見高於頂
世情薄似紙人命續如絲天地一何曠坦蕩負襟期安得千仞崗長嘯一振衣肚皮難化俗永不合時宜

自懺

生性本質直入世已懷憾每求盛氣平寡過強自懺緘口學金人時凜前車鑑

客夢

避難獨南來孤舟爲我送遍地盡烽烟無限流離痛我自安溫飽人多忍
飢凍天心何庸問誰爲蒼生慟故國千里遙夜夜縈客夢

九日和陶二首

情深愁轉多達者得其生良辰來易往長久嘉以名神州四時調氣象自
分明風雨縱如晦破曉鷄有聲運會消萬劫黎庶慰餘齡一木支大夏飄
搖更不傾施暴徒取辱行仁乃得榮物理本如此依依寄遠情翹首頻北
望秋收待厥成

和九日閒居均

蝦夷西來日駸駸殺氣交三徑松菊存小草已先凋驕陽氣燄張難比青
天高掀轟有巨浪颯卷入雲霄天意歸有道橫逆亦徒勞側耳聽嘉音中

心何用焦裁牋遲覓句新詩且和陶詩成酬以酒聊復遣今朝和已酉九月

九日均

贈李協和

君能醫我病我稱君妙手雖阿其所好亦人情所有君性溫且和醫德良
獨厚診候具端詳下藥殊不苟又善探本原分明爲擘剖理智兩相兼誰
能出其右活人旣已多宜乎知名久何須我掄揚稱頌傳萬口

己卯除夕感作

初次走天涯三度逢除夕人生何如耳白駒之過隙夷陋暫相安未肯長
久客猖獗痛倭氛大地遍鋒鏑驚島繼淪陷洞天卜其宅家室幸安全幽
憂略消釋溝壑得餘生窮耕自食力去家三千里密邇如咫尺風便託魚

書聊以道胸臆醜類現獐獐從事爲羅織聞之心膽寒有家歸未得強暴
勢崩潰勝利已在卽前途呈樂觀無復抱悲感顧我雖遠游照料依近戚
有妹本連枝溫存饋衣食有子負笈來晨昏長侍側有客時過從談笑慰
岑寂今夕是何夕新舊歲交迫舊歲將去盡新歲方接迹只此寸光陰寸
陰良足惜餞歲一杯酒舉杯意自適飲罷發高歌不知東方白

瓜棚秋色圖爲李根香題

李子本多藝藝藝推巨擘文則師韓愈詩則學李白書法尤超妙六朝是
法則縑素人爭求什襲藏珍惜餘事研篆籀刻畫入金石又工攝影術天
然任採擇景物收鏡頭詩情畫意得此幅瓜棚圖蕭疏見秋色如履壟畝
間田家風味適如讀龍眠畫濃淡勻水墨善哉一藝人能奪造化力披圖

情無限藝苑喜新闢不避瓜李嫌題詩笑蘇軾

七古

八月十三日滬戰二週年紀念感賦

七月七日蘆溝釁八月十三滬戰繼倭奴鐵騎肆橫行欲把中華供吞噬
海陸空軍一齊來大開劫運如雷屬中華民族抱犧牲爲求生存當自衛
公理料可勝強權揮戈向日指天誓忍把血肉拚槍彈不爲瓦全寧玉碎
山崩海嘯日月昏鬼哭神號天地晦軍如狼虎暴兼橫陣似貔貅堅且銳
寸土堅持三月餘未越雷池終無奈平原一片無險守以七博一犧牲大
戰爭漸入新階段策略變更軍自退肅然鎮靜整軍容保存實力養元氣
壯哉八百一孤軍到底堅守四行內豈徒能作萬人敵英勇之聲震中外

中華魂較大和魂一，分明入國際軍事計畫在全盤，不關一城與一地，至今已閱兩週年。我軍往往擊其背，滬郊時有殲敵聞。倭奴寢食不遑戒，戰以全面抗長期。泥足難拔總崩潰，抗戰必勝建國成。中華民國萬萬歲。

贈劉鐵庵

方挾千金行萬里，能生死人肉白骨。九折臂與三折肱，成就良醫稱技絕。多君海外又懸壺，化為天地有日月。痼瘵在抱，胞與懷信是萬家之生佛。

擬張平子四愁詩二首

我所思兮在中華，欲往從之歸無家。不堪回首淚如麻，倭奴加我以殘殺。何以報之鐵與血，抗戰建國信念切。國仇家恨一時雪。

我所思兮在鷺門，往欲從之阻妖氛。不堪回首心如焚，倭奴加我以刀斧。

何以報之在焦土抗戰建國成底柱中華民族烏能侮

五絕

客裏

客裏家山夢傷心事可痛倭氛掃蕩平慰我萬民衆
我有不平事歷歷心常記一旦能雪申歡呼爲振臂
槍林彈雨進霹靂聲常震壯哉諸健兒殺敵資白刃
書生弄筆翰沈烈更璀璨力可掃千軍斯言當河漢

夜起集定公句

寥落文人命沉沉生鬢絲挑燈人海外獨坐天之涯
少壯心力殫中年萬恨并狂臚詩萬首結習愧平生余作詩喜徵和

我身我不有多難乃緣因坐耗蒼茫想中原況有人

晚眺

落日海潮生憑臨閒意遠所懷將若何悵立忽忘返
颶風卷怒濤砰磅訇磕簸萬籟起婆婆遙天無一舸

擬長吉貴公子夜闌曲

宴罷舞歌衫躑躑燦麗景花氣襲人芬夜闌燈味冷

對酒

一燈吞月魄萬籟葬詩魂悄倚情難遣欣然對酒尊

自題近景

太過書生氣偏令俗眼瞋自矜風節厲以見讀書真

題李明堂與其夫人劉氏儷影

一雙鸚鵡影已是廿年親莫作尋常看世間有幾人

七絕

次石鐘見贈均

一著征衫事遠行此行豈爲買才名羅胸縱有詩千首還作秋蟬漫作聲
天涯幾輩可談詩似汝雄飛我伏雌有酒不妨相對飲頻浮大白尙能支
次雲聲越南見寄韻

蒼波千頃送南來正值春回嶺上梅余離家去國時值小春十月故國傷心淪
浩劫斷鴻零雁有餘哀

千年古國費經營焦土焦民舉世驚賴有長期資抗戰不然何以慰民情

浮海原非作壯游風塵莽莽少朋儔
雙眸忍下窮途淚可有垂青阮籍否
北望中原奏凱旋扶桑東指水瀟瀟
連山河破碎重收拾大好金甌缺復全
十二月十五夜驅馬車玩月

輪蹄輾轉趁風馳夜色空濛樹影移
獨客天涯看明月團圓不似在家時
丁丑除夕感作

韶華易逝歲云殫一枕勞生夢未安
世事滄桑心事定用龔定菴句萬般都
付等閒看

無端橐筆走天南滋味今生試苦甘
難得弟兄重聚首胞妹前年來岷今得重
聚辭年酒晉有餘酣

次石鐘寄雲聲越南韻

閒來何事門心兵割據南天詩作城用夏變夷偏不見揚風挖雅聽無聲
敢誇書法學龍蟠付與隨天類鼠肝入世逢迎多見拙依人門戶本來難

感時次雲聲除夕均

遙知霜雪風雨催猿鶴沙蟲一例哀還我河山唯此舉黃龍痛飲笑顏開
匈奴未滅有何家此恨縣縣靡有涯勝利卽今操左券威名重震古中華
殺敵無能過壯年轉因避地海雲邊行裝檢點毛錐在藉此誅奸祗自憐
國仇家恨兩難忘捷報傳來意氣揚百折不撓堅信念萬民歌詠入詩章

岷江閏七夕

去家千里望迢迢別緒縈懷未易消羨汝雙星多福慧一年兩度會河橋
訪黎殺碑

驅車訪勝仰高風寧死自由作鬼雄
舍已成仁留姓氏峨碑長照夕陽紅
氣節堅強烈士行遺容鐵鑄厲風霜
千秋付與人憑弔碧血青燐耿有光

自訂書例有序

橐筆南來忽忽年餘生涯落莫意態難堪
本不敢以書法酬世奈知者輒來相屬
疲於應付爰訂薄潤以示限制在此國難
期間所收潤資卽以半數充作救濟傷兵
難民聊盡微忱而已時民國二十八年元旦客
次菲律濱馬尼刺

詩是定盒字石盒居夷何陋我何堪
書生落拓尋常事一藝能傳亦自慚
莽莽山河盡國殤未能投筆到沙場
願將耕硯無多穫半濟兵民半作糧
席上集定公句示伯英

歌鐘詞賦兩漂零座客蒼涼酒半醒
僥倖故人仍滿眼萬千種話一燈青
賓客漂流半死生流傳鄉里只詩名
祇今曠劫重生後難遣當筵遲暮情
自題小景

湖山曠劫得餘生亦是窮途作此行
肯向人間消歲月飄零書劍一無成
臨風自覺體清孱異俗難堪是獷頑
何限亂離激悲憤忍揩淚眼望家山
岷步天主教徒時有迎神之舉秉燭遊行名曰均習商

勝會迎神均習商紅男綠女似瘋狂
夜遊秉燭聯翩過展齒歌聲遍一方
亡人節

十一月朔亡人節此日家家祭掃忙
燈燭輝煌人影亂殊方俗尙異家鄉
迎花后

萬人如海迎花后，車水馬龍塞市門。
終是蠻姬金粉氣，無鹽西子費評論。
嘉年華會

金碧輝煌夜未央，平原一片費鋪張。
肩摩轂擊渾無奈，商賈場中亦戲場。
次雲聲戊寅除夕客馬來亞甘馬挽感懷元均

故人天末寄詩催，青鳥銜將島上來。
一紙萬千情緒在，挑燈展誦幾環回。
蹉跎歲月奈愁何，送故迎新發浩歌。
客裏頻添家國恨，幾時重見舊山河。
清明感作

春生芳草碧油油，寒食清明雨作秋。
連日下雨獨倚樓頭鄉思亟，天涯有
客滯歸舟。

滿眼風花慘不春，中原北望溷胡塵。
勸君莫作銅駝感，自有披荆斬棘人。

集定盦句四絕送黃孟圭先生歸國

九流觸手緒縱橫閱歷名場萬態更別有狂言謝時望莫拋心力買才名
頽波難挽挽頽心賸水殘山意度深恥與蛟龍競升斗英雄遲莫感黃金
黃金華髮兩飄蕭塵劫成塵感不銷誰分江湖搖落後萬千哀樂集今朝
偶賦凌雲偶倦飛此生一跌莫全非百年心事歸平澹咒甲樓船海外歸
聞簫有感

南詞簫韻總悠揚一片閒情似故鄉今夕忽添家國恨十分明月九分涼
題黃光城泥足漫畫集

鐵筆描成百葉圖別張新幟一軍孤料他泥足應難拔勝利終知必屬吾
廈門失陷周年敵再以水兵登鼓浪嶼企圖佔領次雲聲聞警感作

三首

跳梁小醜慣興兵平地無波把浪生
龍虎山頭偏黯淡鼓喚有龍頭山廈門有
虎頭山二山對峙鐵蹄看汝又橫行

無端鼓浪又翻瀾大好桃源感不安
欲肆鯨吞難下咽有人袖手靜中看
消息傳來未覺遲萬人恐怖更心悲
不圖國際專圖己可恨東洋木屐兒
無端

無端詩酒困諸身詩寫牢騷酒寫真
如此熊魚誰舍得酒人不作作詩人
寄雲聲星洲

裁書已道三年別結習難除是作詩
家國恩仇猶未報天涯涕淚兩交垂
十年陋巷樂忘憂今日投荒亦壯游
世態炎涼深閱歷繁華一瞥眼中收

旅邸愁懷鬱不平新詩多在枕邊生
劇憐落莫天涯客長夜漫漫睡不成
遙聞嚶雁早心傷秋老何堪憶故鄉
一對菱花翻苦笑風塵詩鬢忽蒼蒼
胡塵滾滾卷殘灰劫後尊前萬事哀
已分安危難預料覆巢何忍首重回
題黃士炳甲子歲游南海普陀禪院留影

倦游當日豪情在丰度翩翩擅一時
名利祇今鴻爪認巍然差喜未淪夷
總角芸牕曾共硯卅年一瞥似風馳
天涯握手翻相笑汝眼昏花我鬢絲

悼洪肯堂

一生顛倒爲紅顏自損腰支入病孱
哭罷秋風成絕響猶留憶桂在人間
君刊有憶桂吟蓋悼其姬人寶桂而作

美人恩併故人情綠酒紅燈話到明
舊日風流消歇盡妝臺難覓伺波生

君取定公甘隸妝臺伺眼波句自號曰伺波生

題汪照陸孝廉與其故姬合影

翩翩才俊稱嘉耦一唱離鸞惱落紅三十六年回首處落紅依舊傍春風
菊農以樵生老人畫菊屬題卽次樵老元均二首

九秋作客負花時憔悴西風入鬢絲回首故園零落盡籬邊可有傲霜支
畫家落筆勢堅剛粉本描摸是白陽一入高人欣賞後堪夸晚節自然香
題王少平侍母圖

世亂有人倡非孝我聞此語似畜鳴安得王郎挽頽俗奉親來報烏私情
題內子林抱慈近影

辛勤廿載樂糟糠我比梁鴻汝孟光今日天涯相對影恰如春曉伴梳妝

寄樓主人寄示近作擊鉢吟依題韻奉和三絕句

春宵初見月團圓破費千金買得還客子天涯誰與共清暉伴我照無眠
元夜

尋芳獨步小園西姪紫嬌紅費品題正值百花生日日金鈴十萬護春畦
花朝

雲游閒散自飄蕭足迹名山遠市囂一襲袈裟一銅鉢絕無罣礙勝漁樵
野僧

贈陳覺夫並題其近影

鼓旗堂正陳同父開拓心胸萬古無恥共參軍作蠻語不將詩句寫姬隅
客邸無聊誰作伴過從晨夕共談詩風塵各有天涯感哀樂中年鬢未絲

贈王則學

論交兩載真情見，瀝膽披肝各自知。似我平生風義重，得君何幸在天涯。

寄竹僊星洲

勞勞燕影自參差，僥倖鷓鴣寄一枝。南島風光無可戀，避災忍復住些時。
填胸靈氣莽蒼蒼，懷抱奇才適異方。地北天南君踏遍，世情領略到炎涼。

謝鐵庵篆印

回春聖手來攻石，刻畫工夫妙入神。風雨一樓懷作者，海天萬里拜斯人。
君命所居曰海天萬里樓，并自篆印。

封泥小印賴君刊，古朴清真不厭看。得句鈴將名字下，生香翰墨在騷壇。

五律

思家作

東夷施暴虐蕩析我田廬千里風波逐一身涕淚餘親朋嗟離散骨肉得
相於盼斷雙魚至緘將尺素書

次雲聲見懷韻

異俗何能堪同流亦可慚蓴鱸鄉味好風雨故人談肥肉食難飽芳醪飲
未酣繭絲終自縛不忍作春蠶

憂時

一副憂時淚臨風灑不禁遠山春黛鎖隔岸暮煙青古抱肝腸熱忘情彼
此形天涯初作客短夢寄伶仃

照陸社長任教南甘馬仁省賦贈

板蕩中原日流離去國愁南天緣巧合舊雨氣相求風雅資揚扆賓朋樂
唱酬薰風移絳帳詩教滿炎洲

七律

戊寅除夕感作

側立南荒一劍橫故園迴首總心驚離家兩度除年過作客無端白髮生
去去閒愁天不語沉沉長夜夢難成思潮忽併春潮急吟罷江山意不平

春感

維新氣象歲更時怪底春風未展眉春意漫從人意懶天心爭似客心癡
風雲壯志今宵減事業名山十載垂待破千金求力士擊秦來試博浪椎

岷江春思四律

椰風蕉雨客中過，
棖觸胸懷憤恨多。
入眼風花春旆旆，
側身天地我蹉跎。
還於紙醉金迷日，
猶作鸞迴鶴舉歌。
遙憶荒江歸寂寞，
啼痕到處染煙波。
刼餘焦土遍南東，
飄泊天涯寄斷蓬。
無數沙蟲哀故國，
三春風雨泣殘紅。
浮沉已覺乾坤小，
輾轉從知歲月空。
悄向尊前照肝膽，
書生挾策在胸中。
滿腔幽恨一登臺，
北向神州哭幾回。
指日邊夷深愾憤，
倚天孤劍獨徘徊。
且將意志集中後，
端賴精誠團結來。
直搗扶桑三島去，
歡呼痛飲莫停杯。
彌天烽火自侵尋，
浩刼初開曠古今。
八表同昏嗟險阻，
萬方多難怕登臨。
衣冠禽獸羞庸輩，
婢膝奴顏恥士林。
永夜思潮頻起落，
遺懷無計託微吟。

南渡

南渡匆匆別故鄉，
消沉無復少年狂。
孤燈短夢家千里，
落日浮雲天一方。

戎馬間關多倥傯烽烟黯淡總淒涼望洋不禁興長嘆大好江山溷大羊
次韻王士寒卽席之作

玉碎寧爲不瓦全神州苦劫又經年有懷家國頻長嘆無病呻吟寄短篇
管領風騷炎海上流連光景夕陽邊鰕生附驥蒼蠅諂祇許追陪醉盛筵
秋日感懷

烽火頻年警斗刀聲聲廝殺徹雲霄淒迷風雨經時變橫暴豺狼得食驕
幾見巨川都染血劇憐廣土半成焦海天極目傷心地萬恨千愁未易銷
中秋感賦

炎方上界月生涼高處寒禁發異光不覺塵囂聲到耳獨看秋色氣如霜
清暉一片閒情遠佳節今宵逸興長生事勞勞詩夢冷可憐無地著清狂

客懷示伯英

天南未見四時調祇覺長年烈日驕此土偏宜附螻蟻一枝無那寄鷓鴣
餘生已少肝腸熱歷劫何堪意氣銷試整羽毛馮奮翮扶搖直上碧雲霄

九月初三夜洪升慶學長宴請詩人於寓樓忝邀附驥賦呈二律

市樓一角關吟窠中有幽人在詠歌此日騷壇酬唱集一時名士過江多
樽傾北海情無限淚灑新亭意若何烽火極天愁黯淡不堪壯志爲消磨
意興年光逐逝波尊前肺腑語應多閒來不少蘭成感劫後寧無子美歌
暑氣轉因秋令酷晚風頻送市聲過家山千里如堪問夢裏依稀悵若何

和陳孝威將軍遊羅絲曼柳溫泉感賦元均

風雲才略震江鄉蹈火何辭况赴湯我愧餘民居樂土人懷志士在沙場

運籌決勝推能事，鐵馬金戈應未忘。
聽罷將軍談戰局，凱歌聲裏整歸裝。
九月初八日夜坐感賦

炎洲九月猶長夏，汗透輕衫熱不支。
客裏光陰雙鬢改，生涯况味一燈知。
情懷難遣真成恨，歌哭無端總是癡。
風雨滿城悲故國，朝來擬作重陽詩。
次韻雲聲己卯重九四十初度客星洲感作

相憐漂泊在天涯，作客身當國難時。
報國襟期年過壯，思家夢裏意成癡。
忍看劫火心如熾，慟哭蒼生淚似絲。
且莫花前歌晉酒，胡塵掃淨固藩籬。
次韻雲聲己卯除夕客甘馬挽感作

神州曠劫亂離年，烽鼓相望遍大千。
聞警涕危心欲墜，挑燈夜靜枕難眠。
歲寒故國無家苦，客老蠻方易代傳。
暫與島夷安陋俗，是真堪笑復堪憐。

自跋

來菲三年所作詩三百餘首茲錄其稍可存者一百三十首名曰菲島雜詩蓋均就目中所見胸中所感者宣之筆墨自知質勝於文不足謂爲詩唯却後餘生得此區區呻吟語彌覺自珍爰付印刷以作紀念并就教於海內外愛我之師友俾知客中之况味而已耳

中華民國二十九年十月警予蘇甦識於菲律賓馬尼刺客次

附 錄

附錄

南游贈詩（以惠稿先後爲序）

岷江遇警予先生

高伯英

依然愧我舊閒身，劫後相逢感慨頻。
湖海飄零游子老，風塵憔悴故人貧。
十年抱璞心真壯，萬里投鞭志竟伸。
獨是何哉悲餓死，彌天涕淚一微塵。

喜晤警予兄賦贈

林石鐘

鶴瘦龜飢劫外身，天涯乍晤話前因。
感時且賦今同谷，避世難尋古富春。
作客君逢多事日，思家我已倦風塵。
桃源倘被漁郎識，浮海居夷暫避秦。

前詩意猶未盡再賦四絕奉正

林石鐘

世亂東坡竟遠行，吟鞭到處卽詩名。
料知遊草如春筍，定向天南噉風聲。
天涯欣晤更談詩，事業輸人豈伏雌。
縱使騷壇飛一騎，殷攻墨守尙能支。

勞生強半馬蹄聲海外空傳絳帳名止酒未能同一笑醉歌喝月倒飛行
家居撞破感難支時命邪卿敢守雌昨夢山靈呼語汝此間風物待題詩

警予我兄初抵菲島書來告慰賦此奉報

謝雲聲

門巷依依密往來十年如舊爲傾梅（同居廣平巷十年於茲矣）相憐都被妻兒累乞到天涯
亦可哀

金門敵續築屯營後患寧無費煞驚念汝離家原不慣客初聞警定傷情（日來又報敵艦轟
擊五通訊）

岷江不少舊朋儔晨夕餘閒許漫游爲問年來老同甫（謂陳君健堂）酒狂尙復似前否
側身海外阻南旋一念吾家涕淚漣兵火餘生還虎口不知能否得安全（舍眷聞居移嶼鼓
虎巷）

歲戊寅夏余客菲島與蘇君警予下榻於陳子健堂寓樓舊雨相逢歡甚君近影囑出題
余擬就絕句未落筆也旋余因病返里休養經月而前度劉郎重來元觀一樓風雨深

夜傾譚爰錄前作聊志海外因緣云爾

柯伯行

揮灑烟雲筆有神髯蘇而後幾傳人炎荒重晤豪情在省識廬山面目真

歲丙子厦中吟侶結社虎溪月必兩集自淪陷後風流雲散人各一方蘇君警予與余後
先南渡得重把臂回首前塵雖有滄桑之感然觀蘇君玉照精神煥發尙足揚眉吐氣
也爲書數語以誌鴻爪

楊宜侯

溪山雲樹已滄桑吟事春婆夢一場今日南來重把袂毫添頰上覺眉揚

戊寅冬來游菲島晤警予詞長海外相逢深感同病每藉唱和以破寂寥茲承命題玉照
匆匆行李敬玃四言聊識鴻泥并留後約諒君亦笑許也仍希教正 林寄凡

數莖白髮情童顏海外文章見一斑笠屐圖留他日約與君春曉話孤山

廿七年自夏徂冬余作客香島警予兄旅居岷里拉時以新詩見寄十二月廿三日離港
南行廿五日至岷里拉適逢耶穌誕日以泊岸時暫未得登陸緬懷伊人能無秋水之
思足見人生聚散固有前緣也爰綴俚語以寄所懷并請教正 吳竹僊

海上多瓊島芳菲四時發錯列南海東往來憑片筏此中有仙人謫居十二月一盃長在手吟
興自激越乞食誰顧盼（君有和陶乞食詩）只可採薇蕨樽中酒不空俛仰羞干謁

我過岷里拉適逢聖誕節伊人阻煙波芳菲未可擷匆匆事海行長灼熱條忽復淹暮俄
頃晨星綴昕夕懷所歡憤懣從此結故巢勞北望舍而不能鏤

翔鳥相隨飛飛飛爲覓食延頸發高吟摧藏隨羽翼天道失故常人情自遄邁炎光延南洲何
以舒胸臆願言慎所守毋爲羅者弋

甘馬挽歲莫寄懷警予老哥非律濱

謝雲聲

歲猶云莫我何堪獨處茅廬俛仰慚傍海狂濤難午夢穿椰幽月忍宵談亂離便覺深愁集偃
蹇思將痛飲酣詩東遠緘蘇季子經年述作可如蠶

港口觀潮聽潮賦寄警予老哥非律濱

謝雲聲

濤聲日捲大江荒淘盡英雄忒莽蒼自別老蘇高詠減人才睥睨我非狂（觀潮）
到此真成絕俗氛牽懷難復共論文月明夜靜潮聲響願借天風送到君（聽潮）

警予先生以近影屬題賦此以應

高伯英

吾友蘇季子極磊落英多修眉未忍畫文章非決科未俗繡聲輓頽流同一波海外閉門居著作又如何

寓樓小集賦贈蘇警予先生

李明堂

哦詩日日翻新意書法流傳自有真難得詩書兩兼絕髯蘇端的是前身

近狀集定靈句八絕答警予我兄

謝雲聲

我所思今在何處夢中喜極故人同祇今曠劫重生後却有江濤動地來
情多處處有悲歎身世無如屠釣寬不是九州同急難幾人怒馬出長安
悔極堂堂歲月遠多君鄭重問烏衣書生挾策成何濟咒甲樓船海外歸
詞流百輩花間盡文字緣同骨肉深誰分江湖搖落後天涯有弟話秋心
不容兒輩妄譚兵閱歷名場萬態更揚屹千秋儒者事更何方法遣今生
天花拂袂著難消不是斯文擲筆驕誤我歸期知幾許萬千哀樂集今朝

吟罷江山氣不靈，珊瑚擊碎有誰聽。
起看歷歷樓台外，此夕銀潢少客星。
夢中傷骨醒難支，萬舶安危總未知。
恥與蛟龍競升斗，蠹魚零落我歸時。

題警予詞兄造象

劉鐵庵

我挾方書君橐筆，流離辛苦話炎洲。
時危還幸吟身健，世亂偏驚歲月遒。
憂國心腸真激烈，照人眉眼尚溫柔。
騷壇多少稱雄輩，樂與先生互唱酬。

題警予詞兄近影

陳覺夫

劫後相憐虎口餘，渡江那便得安居。
須眉無改肝腸熱，爲濟災黎更鬻書。

次韻酬警予吟兄見贈

汪照陸

杖履淘兵劫，詩歌販客愁。
經鄒承馬鄭，道契憶羊求。
對酒無情思，呼花與唱酬。
餘情散慰藉，風月共南洲。

警予吟長南來賦贈

王健堂

烽火中原日方針，正指南家山。
淪浩劫，客邸接高談，才藻追雙陸。
詩書紹二倉（君詩學定倉）

書法石齋）雲煙收筆底蔗境老彌甘

戊寅除夕和詩（以惠稿先後爲序）

林石鐘

吟鞭隨處任縱橫腕底龍蛇下筆驚畢竟疎狂難作客敢因離亂嘆餘生
天南風俗應須記海外文章只自成歲月嶢嶢人影健莫將消息問君平

林寄凡

車馬銷聲斗柄橫一篇島祭鬼神驚身同謫戍原無罪我亦聰明誤此生
可有杖頭供買醉如斯棋局坐觀成也知老去蒲團穩碌碌何時了向平

王則舉

入夢家山半枕橫聽殘蠟鼓客心驚詩從酒外燈花祭春向天涯爆竹生
壓歲錢羞囊探澀寄書墨被漏催成倚閭孤負年年望垂暮慈親感不平

汪紹黃

附

錄

除夕和詩

七

一湖煙雨漾舟橫歲月更新作客驚
庚信江關悲故國杜陵身世問蒼生
回天無計愁天老去恨猶添種恨成
等待黃鸝啼斷處西山落日海潮平

莊復初

歲除月晦斗參橫羌笛胡笳入耳驚
客夢怕隨殘蠟斷鄉心每逐晚潮生
偕亡時日千夫指新築長城衆志成
急景凋年催白髮匈奴未滅恨難平

柯伯行

憑欄夜靜斗牛橫急景凋年暗自驚
春意潛從芳草長客愁偏逐暮潮生
飄零書劍身差健破碎河山血染成
歷歷繁華都似夢不須得失問君平
髯蘇才氣信縱橫酒後狂言四座驚
一例騷心吟屈子三春蝶夢付莊生
淒涼世業拋將去黯淡湖山畫不成
却待扁舟歸里日好尋樵牧話昇平

龔紹庭

忍看滄海肆流橫鼙鼓聲催客夢驚
劫後河山思故國老來萍梗厭餘生
鷄蟲得失終無奈琴

劍悲歌百不成同是天涯淪落輩新詩讀罷意難平

許耀銓

鞭絲笠影馬縱橫笳鼓催春客思驚塞北猢猻方作劇江南鼯鼠可憐生
燈前蓬髮三更改枕上華胥一夢成無限滄桑人事感經多世道覺山平

莊克昌

海外相逢涕淚橫劫餘時復夢中驚淒迷城郭春雲漫惆悵蒹葭秋水生
守歲無家嗟遠別祈年有句喜先成鄉關萬里頻回首金帶河邊落日平

陳少軒

酒罷高歌意氣橫歲闌根觸客心驚未能迎送難諸俗祇爲疏狂誤此生
五夜思家頻入夢十年浪迹一無成漫將冷眼看餘子彈鋏依人總不平

黃孟圭

使君豪邁劍猶橫又易年華我自驚非拜黃金羈異國漫垂絳帳詔諸生
爲牛空喚身無力畫

虎柯堪志不成獨向汪洋一長嘯天風吹蕩氣能平

林少華

撓槍猶向斗南橫浪捲乾坤擾復驚白馬空歌悲素志紅羊有劫嘆蒼生除年酒益懸弧感（除夕爲余生日）抗敵詩多落筆成（拙著抗敵叢吟若干篇）豈爲閒吟消歲月一腔恨氣未能平

黃仲琴

欲接車塵瘴霧橫春城草木烏猶驚亂時陳蹟隨流散除夕新詩重友生海國文章蘇玉局江關蕭瑟庾闌成閒居不覺韶光速自慰宵來雜念平

李根香

中原敵騎久縱橫萬井流離宇內驚年少執戈爭衛國蠻荒遯跡愧儉生和戎策豈千秋計破虜功應百戰成臘盡春回看奏凱山河有待詠昇平

王熙巖

銅琶高唱斗杓橫響遏天雲四座驚鄉樹愁遮千里渺江流望斷九迴生笳聲永夜消鐙餘
布幾時立馬成宜把彎弓跨海去東瀛射得怒潮平

夢幻

新詩捧誦句縱橫學和無才下筆驚白鹿每思魂欲斷烏衣悵望感頻生（廈門一名烏衣國
白鹿洞爲廈門名勝）落花何事春猶到報國空懷志未成巾幗英雄推古代木蘭上馬戰雲
平

葉向晨

丁街車馬騁縱橫萬瓦紅燈照眼驚癩祭詩酬窮歲去鳳城草逐春風生韶光驪鬘天難老事
業麒麟夢可成獨有蒼波知客意對人起伏不能平

伍喬年

無恙圖書一榻橫曾經離亂兩忘驚瑟琴歌鼓知音少筆墨因緣晚恨生三月傳箋韻始得廿
年作客歲猶成如君再度除年耳髮白從來過不平

我亦天涯涕淚橫，爆聲響處旅魂驚。
流離除夕頻思眷，憂患中年更惜生。
莫爲梅桃迎臘缺，早催酒脯祭詩成。
騷壇各據南荒地，一例高歌氣豈平。

謝雲聲

古塵

問鼎中原胡馬橫，烽烟未靖客心驚。
韶華過眼三年易，白髮搔頭一夜生。
擲筆蠻天空自嘯，側身人海百無成。
春回大地干戈裏，殘寇應隨殘臘平。

陳熙堂

崎嶇世道莽交橫，况值殘年烽火驚。
老我青山空約在，催人白髮逐愁生。
功名終古渾如夢，事業而今媿不成。
一樣淒涼家國恨，海隅何日浪潮平。

陳晴圃

潛逃島上憶田橫，變徵歌聞壯士驚。
去國有懷心事急，思家無計客愁生。
八千路遠雲縹緲，卅六鱗開句老成。
舊雨霑來炎海外，積年飢渴一宵平。

陳雪蕉

胡兒猶自氣縱橫
疊唱聯吟引客驚
急景分明增戰力
無家未必可憐生
春來離恨時時長
事到臨頭節節成
遙領凱旋將立奏
同君歸去慶昇平

李軒甫

一天星斗氣縱橫
破碎山河憶目驚
燈劍鑄將搖落感
妻兒課罷欠呵生
詩情已併愁如許
臘酒初溫夢未成
殺賊荷戈男子事
心懷萬種總難平

楊文昭

斗室同居臥榻橫
是誰嚔語夢魂驚
歲殘心事空銷歇
劫裏知交半死生
北望烽煙猶未了
南來桃李盡新成
流離骨肉勞人恨
故國妖氛待救平

張子貞

衝霄浩氣斗牛橫
喉鶴哀鴻遍地驚
煮酒有人空度歲
祭詩無計遣今生
相思刻骨深如許
塊壘填胸去不成
唱罷大江東去也
坡公此日氣應平

陳墨塵

附

錄

除夕和詩

十三

瘡痍滿目淚縱橫，鶴唳風聲入夢驚。
壯士無謀猶有血，丈夫怕死亦虛生。
人因作客傷年盡，詩爲驅愁倚枕成。
回首故園春似海，江潮滾滾怒難平。

呂學琰

江天極目斗牛橫，餞臘傷春各自驚。
別有閒愁添白髮，可無感慨慰蒼生。
詩才左海推前進，書法眉山擅早成。
一自鷺門分手後，時蒙尺素慰生平。

讀汝詩無一筆平哀時重見庚蘭成，
笑啼酬世罇前發。憂患磨人枕上生，
絕代風雲春似醉。半江烟雨夢頻驚，
滄浪亭主今猶健。付與隨天氣自橫。

錢碧海

小窗忽透一枝橫，春意撩人暗自驚。
四月狂飈梅淚急，八千幽怨晚潮生。
故園臘事休相憶，客邸詩情只自成。
寄語鳴禽且收住，欄干愁緒正難平。

陳師陶

嘯傲南荒一水橫，優游不受暴風驚。
驚懷未減思蘇子，壯志能酬慕祖生。
嫉世文章難寫出，感

時詞賦易吟成殘年臘鼓聲何急擾我心潮也不平
狂風暴雨任縱橫好夢山樓幾度驚封豕昂休過望遊魚惘惘度殘生健兒百萬心皆壯小
醜猖狂勢不成且莫天南傷歲莫佇看東海盡波平

李子昌

除年劇飲到參橫易老韶華客自驚看盡浮雲嗟事去笑非駿骨枉天生鄉心千里鴻飛沒春
夢一場蝶幻成萬物榮枯天管領不須消息問君平
諸君廣和筆縱橫妙墨新篇到眼驚如此風流餘幾輩有緣文字締三生哦詩聲裡春初訊憂
國淚邊歲又成太息風塵人易老滿懷心事話難平

吳紫嵐

車馬招搖夜氣橫喧嘩蠻俗客心驚銅琶響對軍聲動爆竹聲和戰礮生歷歲有錢春不買驅
雛未聲夢難成收音機上通宵播聞角相期蕩寇平（非人風俗除夕必驅車街市並以破舊
銅質罐器雜擊相與呼噪爲樂謂可滌盡否運）

廟廊守夜策縱橫決勝藏鈞未震驚酒備屠蘇邪可辟爐添商陸冷難生謀攘夷計軍韜略節
餽歲錢衆責成完璧神州非社肉三妖猶夢學陳平（全非華僑自抗戰後年年節省除夕謠
費以加助我政府）

洪升慶

李杜才華詞筆橫千軍一掃使人驚朱顏羨汝心猶壯白髮如予老更生胸富閒吟皆自得腸
枯覓句總難成漫嗟鴻爪留南國待却胡塵恨始平

王士寒

鬚髯如戟鏡中橫四十明朝屈指驚歲月易催唯老大癡歌難賣是狂生豪情北海千杯滿豔
福南柯一夢成惆悵瀛壺舊吟侶何年重與慶昇平

許梅溪

細雨樓頭一笛橫惱人心事旅魂驚數聲爆竹除年過幾樹寒梅向晚生浪迹江湖歸不得飄
零書劍恨無成鄉思此夕情尤切故國烽烟尚未平

陳丹初

欲和新詩久未成中原掉首客心驚
但看春色同梅柳難挽長河洗甲兵
壁裏沙蟲哀故國天涯萍梗感餘生
果能運轉龍蛇歲與爾傾觴醉太平
（開薩上將在閩扶鸞有太平近在龍蛇歲之句）

傅孫安

神州浩劫受倭橫
盡猶存警鐸驚沉痛
流離多酷遇蹉跎際會一虛生
保疆早願囊傾出瘡寇殊甘血濺成
節夜何心酬雅唱客途書劍總難平

劉鐵庵

豺狼當道任縱橫
萬里烽烟入望驚
骨肉流離悲去國
風塵書劍負平生
傾來殘酒愁偏長
挑盡孤燈夢不成
我亦有家歸未得
新仇舊恨總難平

石湖山樵

倒海風翻巨浪橫
沉沉殘夜夢魂驚
蛟蜃輕掀先遺業
虎口爭延後半生
異族羞爲趙孟頫
德

門敢望鄭康成知非豈獨知前事世路崎嶇總不平

仙鄉道人

眼看處處陣雲橫寵辱而今總可驚國難方殷誰效死時艱無補愧虛生大材不信難爲用有志奚疑事竟成天意人心相感召何須杖策訪君平

吳大玠

傷心孤島失田橫消息傳來夢亦驚海外相看惟有淚尊前對語欲無生風懷蕭索年將別烟火迷離劫已成惆悵水操臺畔路伊誰更說鄭延平

紀如松

孤山梅影久斜橫如此風雲幾度驚也入市塵作商賈豈因憂患屬書生入時可惜才原拙鑄錯何堪鐵未成底事今宵了無奈臨江灑酒弔延平

杜印陶

磨劍何須十萬橫聲聞游擊賊心驚年除烽火烟難燼兵老干戈強尙生君幸孤鵬能水度我

悲一簣未山成岷江雁送髯蘇字相祝中原早太平

林耐拙

病餘愁見遠山橫閉戶無聊輒自驚晚歲飄零雙淚落頻年潦倒百愁生耕三耕九難如願立德立功愧未成異地遙聞歌戰勝胡塵掃淨祝昇平

吳古圖

更闌獨步斗牛橫旅次思家客夢驚轉眼今宵除夕盡回頭來歲端履生挑燈守夜情何限倚枕敲詩睡不成默念金經虔禱祝早消國難慶昇平

王健堂

俯仰乾坤玉斗橫歲除何事客心驚文章許國千秋在氣節眉山並世生耽酒應如彭澤令著書好繼鄭康成漫傷故土笳聲起拭目腥氛一掃平

李明堂

無端敵騎太縱橫風鶴頻年處處驚詞客悽遲懷歲暮神龍蟄伏待春生憂時臘醞傾觴醉快

意新詩付梓成大力乾坤旋轉日扁舟歸去看昇平

楊宜侯

機易山川眼底橫回思故國雨風驚萬方多事難如願數載離家恨轉生遙夢關心知歲盡微吟叉手覺詩成烏衣巷失傾巢燕（廈門一名烏衣國）我憶梅花宋廣平（向在廈時和周墨丈癸亥除夕之作有明朝且待梅花發一賦清高宋廣平句迄今人地兩亡思之猶有餘痛）

謝玉樹

又轉乾坤斗柄橫催人時節客心驚千金難買光陰住百事都從明日生老大莫愁經歲暮兒曹恰喜及年成醅酥酒煖和詩下萬丈思潮春水平

李協和

大好河山寇禍橫干戈處處客心驚思量世事千般幻閱歷人間百感生鐵板銅琶蘇玉局江關蕭瑟庾蘭成歲朝明日生機滿百萬黔黎望太平

02

443+15

21